

EN PAULUJ A KIJIN LIKAU ON MEN EPIJOJ.

¹ PAULUJ wanporon en Iejuj Krijtuj amen pan kupur en Kot *on* me jaraui o lelapok kan ren Krijtuj Iejuj me mi Epijuj. ² Mak o popol jan ren Kot Jam atail o atail Kaun Iejuj Krijtuj en mi re omail! ³ Meid iajanai Kot o Jam en atail Kaun Iejuj Krijtuj, me kapaia kin kitail lar *jon* en pai nenin karoj jan nanlan ren Krijtuj. ⁴ A kotin pil kitail dar re a, mon jappa jaikenta pajondier, pwe kitail en jaraui o minla mo a ni limpok. ⁵ Me pil kileledier, me kitail, en wiala japwilim a jeri ki Iejuj Krijtuj, duen a kotin kupura mauki. ⁶ Pwen kalinanada a mak lapalap, me a kotin make kin kitail ren Kompoke pa a, ⁷ Me kotin dore kin kitail la nta o lapwadan dip akan ki a mak lapalap. ⁸ Me a kotiki *on* kitail ni *jon* en lolekon o koiok karoj, ⁹ Ni a kotin diarok *on* kitail er me rir en kupur a duen a kotin kupuramaauki o duen a kileledier ren pein i. ¹⁰ Pwen pwaida anjau lao leler en wijik penan tapwi ta ieu meakaroj, ren Krijtuj, men nanlan kan o men jappa kan *on* pein i. ¹¹ Me pil kare *on* kitail jojo eu, kitail me kileledier duen kupur en i, me kin wiada meakan karoj, duen a kotin kupura, ¹² Pwe kitail en wiala men kalinanada i, kitail, me kaporoporeki Krijtuj, ¹³ Me komail pil kaporoporeki murin omail roner majan en melel o ronamau en kamaur; me pil kilele komail kidier Nen jaraui en inau, ni omail pojonalas. ¹⁴ Iei men

kamelele en atail jojo, lao lel anjau en atail konodi maur joutuk, pwen wiala japwiilim en Kot o men kapina a linan. ¹⁵ Ari, i lao ronadar duen omail pojon Kaun Iejuj o duen omail limpok *on* jaraui kan karoj, ¹⁶ I jota kin dukedi jan ai danke pweiki komail, o i kin tamatamanda komail ni ai kapakap akan; ¹⁷ Pwe Kot en atail Kaun Iejuj Krijtuj, Jam en linan, en kotiki *on* komail *nen* en erpit o kaudial, pwen ajada i, ¹⁸ O kotin kamaraini maj en monion omail, pwe komail en kak dedeki kaporopor en omail paeker, o linan laud en jojo, me onoper *on* jaraui kan, ¹⁹ O a manaman kaualap *on* kitail, me pojonlar, duen a dodok manaman, ²⁰ Me a kotin kajanaledar ren Krijtuj ni a kotin kaiajada i jan ren me melar akan, ap kajapwiladan pali maun nanlan, ²¹ Ilela jan meakan karoj, o manaman karoj, o kelail o men poa kan o mar karoj, kaidin ni muei wet eta, pwe pil ni muei kokodo. ²² O a kotiki *on* meakaroj pan aluwilu a kan, o kotin kajapwiladan tapwin meakaroj ren momodijou, ²³ Iei war a, iei kadir pan me kadirela meakaroj.

2

¹ PIL dueta komail ni omail melaki japon o dip akan, ² Me komail dadaureki maj duen tiak en jappa et, o duen wiawia en jaupeidi o, me manaman pan *lan*, iei *nen* o, me kin dodok ren jeri jopeik kan anjau wet. ³ A kitail karoj pil weweid nan pun arail maj o ni *inon* en uduk atail, o kapwaiada *inon* en uduk o lamelam, o kitail me udan jeri en *onion* akan dueta me tei kan. ⁴ A Kot, me dir en kalanan, pweiki a limpok me a kotin pok *on* kitail lar, ⁵ Nin dokan atail melaki

japun kan, nan a kamauri kitail dar ki Krijtuj, pwe mak o, me komail dore kila, ⁶ O pil kotin kamaur kitail dar o kotin kajapwil kitail dan nanlan ren Krijtuj Iejuj, ⁷ Pwe a en kotin kajanjaleda a mak o kalanan lapalap ni muei kokodo on kitail ren Krijtuj Iejuj. ⁸ Pwe ni pojond komail kamaur kilar mak; a kaidin pweki pein komail, a pai eu ren Kot, ⁹ Kaidin ki wiawia kan, pwe jota amen en akjuaiki. ¹⁰ Pwe jpwilim a dodok kitail, me wiauier ren Krijtuj Iejuj on wiawia mau kan, me Kot kotin kaonopadan kitail er, pwe kitail en dadaurata. ¹¹ Komail ari tamatamanda, me komail men liki maj o, me aluki uduk pwel, men kaindinda jo-jirkomjaij ren me jirkomjaij, me kinwiaui ni uduk manin pa. ¹² Pwe ni anjau o komail likin Krijtuj, o likin pai en Ijrael, o likin inau en jojo kan; i me jota omail kaporopor o jota omail Kot ni jappa wet. ¹³ A komail me doo wei jan mepukat maj o, a anjau wet komail me korendor o mi ren Krijtuj Iejuj pweki ntan Krijtuj. ¹⁴ Pwe i atail popol, me wia kin ira eu, o me kotin kawela kel o, me mi nan pun ara, ¹⁵ Ni a kotiki jan imwintiti re 'ra ki pali uduk a. Iei kapun o me audekier kujoned akan, pwe en kotin wia kin ir ala aramaj kap ta men on pein i. ¹⁶ Pwen kalolamaui on Kot ira ni war ta ieu pan lopu murin a kotin tiakedi imwintiti ki lopu. ¹⁷ O a kotidoer padaki popol on komail, me doo wei jan, o popol on me koren akan. ¹⁸ Nan pweki i kita karoj kak tu on Jam ki Nen ta ieu. ¹⁹ Komail ari jolar men liki o men wai, a me pweledan akan ianaki jaraui kan o kijan penainai en Kot. ²⁰ Me kakauda pon pajon en wanporon o jaukop akan, a pein Iejuj Krijtuj me

takain pukakaim. ²¹ I waja kajukajuk kin koda jan ia, wiala tampaj jaraui en Kaun o, ²² Me komail pil ian kokon penan mol en Kot ren Nen.

3

¹ I me nai Pauluj en Iejuj Krijtuj a jalidi men pweki komail men liki kan, ² Due me komail ronadar iran ai koa dodok en mak en Kot, me i aleer pweki komail. ³ A kaudial eu, me kajanjale on ia, me rir akan, duen ai intin motomot on komail er nin tapi o ⁴ Ari, ma komail pan wadok, komail ap pan diar, duen ai lolekon ni me rir akan ren Krijtuj. ⁵ Me jota kadiarok on aramaj akan ni muein maj o, ap kadiarok on japwilim a wanporon o jaukop jaraui kan ren Nen: ⁶ Pwe men liki kan en ian jojo o ian kijan war a, o ian a inau ren Krijtuj Iejuj ki ronamau, ⁷ Me nai wiala papa men duen ai pai en mak en Kot, me i aleer ki a manaman lapalap. ⁸ Nai, me tikitik jan jaraui kan karoj, aleer mak wet, en padaki on men liki kan duen kapwapwa lapalapia en Krijtuj. ⁹ O pwen kamaraini amen amen duen koa dodok en rir akan, me nekinek jan nin tapin kaua ren Kot, me kotin kapikadar meakan karoj, ¹⁰ Pwe anjau wet men poa kan o me manaman akan, me kotikot nanlan, en ereki momodijou jon en erpit en Kot karoj. ¹¹ Duen kupur a, me a kotin kileledier ni tapin kaua ren Krijtuj Iejuj atail Kaun. ¹² Pweki i me kitail pil kak aimaki tu on Kot ni atail kaporopor o poj on i. ¹³ Nan i me i men poeki, komail ender motot ki ai kamekam kin komail, pwe men kalinanada komail. ¹⁴ I me i kin kelepuki on Jam en atail Kaun Iejuj Krijtuj, ¹⁵ Me mar en penainai

pokon nanlan o jappa tapi jan ia. ¹⁶ Pwen kotiki on komail manaman, duen a kapwapwa en a linan, en kelaileki Nen i nan pali lol en aramaj, ¹⁷ Pwe Krijtuj en kotikot nan monion omair pweki omair pojondi, pwe komail en tenedi o jondi ni limpok, ¹⁸ Ap kak on ian jaraui kan karoj dedekida täläp, o aned, o lol, o ile; ¹⁹ O en pil ajada limpok en Krijtuj, me jikida jan erpit karoj, pwe komail en direki kupur en Kot karoj. ²⁰ A i, me manaman on wiada, me lapa jan atail poeki o lamelame duen o manaman o, me kin dodok lol atail. ²¹ Linan en ko on i ni momodijou pan Krijtuj Iejuj kokolata joutuk. Amen.

4

¹ NAI en Kaun a jalidi men, kin panaui komail, pwe komail en kekeid inenweita ni koa eu, me komail paeker on, ² Ni karakarak melel, o opampap, o kanonama, o limpok pena nan pun omair. ³ Ankelail on wia minimin eu ni Nen jaupena ki jal en popol. ⁴ War ta ieu, o Nen ta ieu, duen me komail paeker on ni kaporopor ta ieu, en omair paeker on. ⁵ Kaun ta men, pojondi ta ieu, paptaij ta ieu, ⁶ Kot o Jam en karoj me ta men me kotin poedi meakaroj o daudaulole, o me kotikot lol atail karoj. ⁷ A kitail karoj aleer atail pai en mak duen jon en kupur en Krijtuj. ⁸ I me a kotin majani: Ni a kotidalan poa, a kotin jaliedi me jalidi kan, o a kotiki on aramaj pai kan. ⁹ A iaduen, ma a kotidalan poa, kaidin a pil jo kotidilar pa jed, waja lolia maj o? ¹⁰ Me kotidila, i ota, me kotida wei ileila jan nanlan kan karoj, pwen kadirela waja karoj. ¹¹ O a kotin kajapwilada akai, en wanporon

akan o akai en jaukop akan, o akai en waronamaukan, o akai en jilepa o jaunpadak kan. ¹² Pwen kapunala jaraui kan on wiawia dodok eu, me pan kauada war en Krijtuj. ¹³ Kitail karoj lao lel on pojon ta ieu, o lolekon ki Japwilim en Kot, o wiala ol melel, me paroki on Krijtuj ni a unjokela, ¹⁴ Pwe kitail en jolar tau en jeri pwelel, me mokimokideki jili padak likam, me kin pwai kida kotaue en aramaj akan o ar likam, o widiwidin me re kin wiada, pwen kaweid japon. ¹⁵ A kitail en melel ni limpok, ap kakairida ni jon karoj on Krijtuj, me tapwi o. ¹⁶ Me war pon kakauda jan o kokon akan karoj kateneten pena ia; a kokon pukat papa pena, duen dodok en kokon akan eu eu, duen ar itar on, iduen war o kin kakairida o maular ni limpok. ¹⁷ I me i indai on komail o kadede kila Kaun o, me komail ender weweid dueta men liki kan kin wia ni aklapalap en nen ir. ¹⁸ Me nen arail rotorotalar, o re jan maur en Kot, pweki ar jololekon me mi lol arail o pweki monion arail kapitakailar. ¹⁹ Me jolar pam waja, ap mueid on pein irail, en dender o inon ion kapwaiada jon en jaut akan karoj. ²⁰ A kaidin iduen, me komail ajadar ren Krijtuj. ²¹ Ma komail roner duen i o padakki i, me tiak melel mi ren Iejuj. ²² Komail ari muei jan tiak en maj o aramaj marin, me kin kawe kila pein i inon jued. ²³ A komail en kawilikapada nen omair! ²⁴ O danwar anekila aramaj kap, me wiauier duen kupur en Kot, ni melel o pun o jaraui. ²⁵ I me komail en kajela likam amen amen ap lokaia melel on men impa, pwe kitail jau ta ieu. ²⁶ Ni makar komail der wia dip, o katipin der kirila mon omair injenemaula. ²⁷ Ender duki on tewil o! ²⁸ Me pirap,

ender pur on pirap, a mak eta, en dodok, kadokeki pa kan dipijou mau, pwen kaonop da kijakij on me jamama kan. ²⁹ Kajoi jaut ender ko wei jan nan au omail, a men kamau, pwen papaki on me karon akan me mau. ³⁰ Komail der kamauke Nen jaraui en Kot, me komail kilelekier on ran en kajapaledo! ³¹ A limelimek jueed, o linaranar, o makar, o men pei, o lalaue en doo wei jan komail, o pil jon en jueed karoj. ³² A komail en kadek pena, o poka pena, o mak pena amen amen, dueta Kot kotin maki on komail ren Krijtuj.

5

¹ KOMAIL kaalemoni Kot dueta jeri kompok kan. ² O kekeid ni limpok dueta Krijtuj, me kotin, pok on kitail, ap kotin jokonpaude kin kitail, pwen wiala kijakij o mairon eu, me kin pomau on Kot. ³ A nene, o jon en jaut karoj, o norok kapwa ender man pwaida re omail, duen me kon on jaraui kan. ⁴ Pil der lokaia jueed, o kaman, o lokaia mal, me jota kon on, a iet: Komail en danke. ⁵ Mepukat komail en aja o dedeki, me jota me nene, de jamin, de me norok kapwa, me poni ani tikitik, pan kak jojoki wein Krijtuj o Kot. ⁶ Jota amen en kotaui ki komail lokaia mal, pwe mepukat kin kareda onion en Kot on jeri jopeik kan. ⁷ Komail ender kij arail. ⁸ Pwe maj o komail me rotorot, a met komail marainlar ren Kaun o; weweid wei duen jeri en marain akan. ⁹ Pwe wan marain mepukat: Kamau, o pun o melel. ¹⁰ O kajauiada, me kin kaperenda kupur en Kaun o. ¹¹ O der waroki on wiawia jueed en me rotorot akan, a mak eta, en kapun on irail. ¹² Pwe me re kin wiada waja

rir, me jued o jota mau *on*, en inda. ¹³ A karoj me pan kajanaleda, pan kadiarok kida marain, pwe marain kin kajanaleda meakaroj. ¹⁴ I me a kotin majani: Pirida koe me mamair, o paurida *jan ren* me melar akan, a Krijtuj pan kamarain uk ada. ¹⁵ Kalaka, pwe komail en keid ineneweita, kaidin duen me lolepon a duen me lolekon kan. ¹⁶ Audaud anjau mau, pweki ran akan me jued. ¹⁷ Komail ari ender lamponla, a en lolekon, pwe i duen kupur en Kaun. ¹⁸ Ender kamom wain, pwe a kin kareda tiak jued, a komail en direki *Nen*. ¹⁹ O jauaj pena ki pjalm, o kaul en kapin, o kaul nenin; komail kaul o kajan *on* Kaun o nan monion omail. ²⁰ Danke kaukaule Kot o Jam ni mar en atail Kaun Iejuj Krijtuj. ²¹ O papa komail pena amen amen ni majak dol en Krijtuj. ²² Komail li akan, udi *on* pein omail warok kan dueta *on* Kaun. ²³ Pwe ol o me tapwin a paud, dueta Krijtuj me tapwin momodijou, o i me Jaunkamaur pan war a. ²⁴ A duen momodijou kin udi *on* Krijtuj, iduen li akan en udi *on* ar warok kan ni meakaroj. ²⁵ Komail ol akan pok *on* pein omail warok kan, dueta Krijtuj kotin pok *on* momodijou o kotiki don i pein i. ²⁶ Pwen kajarauala i, o kamakelekeleda i ki pil o, iei a majan. ²⁷ Pwen kajanjale don pein i momodijou linan, me jota topala o omrok ape, a me jaraui o jo kaopa kot. ²⁸ Nan iduen ol akan en pok *on* ar warok kan dueta pein war arail akan. Me kin pok *on* a warok, kin pok *on* pein i. ²⁹ Jota amen kin juedeki pein uduk a; pwe a kin kamana o kanainai eta, dueta Krijtuj kin kotin apwali momodijou. ³⁰ Pwe kitail me kajan en war a, o uduk

a, o a kokon akan. ³¹ I me aramaj o pan muei jan jam a o in a, ap muei on a paud, ira ari pan uduk ta ieu la. ³² Meid kaponepon lapalap eu; a nai kaparokki duen Krijtuj a warokeki on momodijou. ³³ Pil dueta komail, amen amen komail en pok on a warok dueta pein i, a li o en kakaki a warok.

6

¹ KOMAIL jeri kan peiki on me wia komail ada pan Kaun o, pwe i me pun. ² Kakaki jam om o in om, iei tapin kujoned, me inaupa mia, ³ Pwe koe en injenemau o pil maur warai nin jappa. ⁴ Komail jam akan der kamakar mal noumail jeri kan, kakair irail ada ni kaian mau o panau on Kaun o. ⁵ Komail ladu kan en oke omail jaumaj akan ni pali uduk ni majak o rerer o pil ni tiak en karakarak en monion omail dueta on Krijtuj. ⁶ Kaidin janjal mon aramaj eta, pwen konekon re 'rail, a en dueta ladu en Krijtuj, me kin pereperen wiawia kupur en Kot jan monion omail. ⁷ O komail en papa mau, pwe on Kaun o, a kaidin on aramaj akan. ⁸ Pwe komail aja, me mau kot, me amen pan wiada, Kaun pan katini on i iota lipilipil ij i, ma ladu de me maioda amen. ⁹ O komail jaumaj akan en wia dueta on irail, o der jakone irail, pwe komail aja, me arail o pil omail Jaumaj kotikot nanlan, o a iota kotin lipilipil aramaj amen. ¹⁰ Ikmuri ri ai kan komail kelailleki Kaun o ni a manaman. ¹¹ Purion tatan mauin karoj en Kot, pwe komail en kak kelail palian tewil a widiwidin kan. ¹² Pwe kaidin uduk o nta, me kitail en pei on, a on jaupeidi o manaman akan, o on jaumaj en jappa kan, me kin kakaunda nan rotorot wet, o on

kaun *nenin en lan akan*. ¹³ Ari, pweki mepukat komail en ale tatan mauin karoj en Kot, pwe komail en kak kelail ni ran jued, o kajinenda murin omail kapwaiadar meakaroj. ¹⁴ Komail ari kajinenda, luke pamail en katenetenki melel o pereki pere pan maramara me pun. ¹⁵ O nä omail en kitekit pena, pwen onop *on wa jili ronamau en popol*. ¹⁶ A pil eu pan ko *on* mepukat: Komail ale perepa en pojond, pwen kakun kila katieu kijiniae en me jueid o. ¹⁷ Komail pil ale lijom en kamaur o kodlaj en Nen, me majan en Kot. ¹⁸ O podidi *on* kapakap o wia poekipoeki. *Nidinidiki Nen ni meakaroj*. O majamajan, o poden kapakapaki jaraui kan karoj. ¹⁹ O kapakapa kin ia, pwe i en *nil meledok o au ai en jara pajan ai ainar en kaweweda me rir en ronamau*. ²⁰ Me *nai jaunpadakepa*, me *jalidier*, pwe i en kelail *on padapadaki*, duen me kon *on*. ²¹ A pwe komail en aja ir ai kan, o me i kin wiada, ri atail kompok Tikikuj o papa lelapok en Kaun o, pan padaki *on komail meakaroj*. ²² I me i kadarala, pwe komail en ajadar ir at akan, o pwe i en kamait monion omail. ²³ Popol *on ri atail*, o limpok ianaki pojond jan ren Kot Jam o Kaun Iejuj Krijtuj! ²⁴ Mak en mimi ren karoj, me kin pok *on atail* Kaun Iejuj Krijtuj kokolata!

**Kadede Kap Pjam Akan
The New Testament and Psalms in the Pohnpeian
language of the Federated States of Micronesia (old
translation, using old alphabet)**

Public Domain

Language: Pohnpeian

2014-11-10

PDF generated using Haiola and XeLaTeX on 11 Nov 2022 from source files
dated 30 Nov 2021

1941731f-581e-5815-a2a4-a976cf53af02